

I MINAMMANANGO NGA ARI MAKONTENTO

Turi ta ollu nga aggaw, egga i atannang nga laka-lakay nga minammanango. Nu maguroran, egga laman yaya ta unag na balay. Mallawan laman ta pakabalin na masikan nga uran. Iyusa na kanayun i dana nga kapoti anna ivuluvulun na i anaddu nga baring anna basiku na.

Tadday nga aggaw, ta aggangay na ta bannag, neyavu na ta baggi na.


"Ngatta pano ta neyawatan na Yafu ta anaddu nga takki? Tapenu alistu na pano nga makadaki?"

Ta pakadde na ta bannag, pinegafuwanan na insigida i magimmanango. Nabinnay i pinammanwe na.

Kada makagafu yaya ta babbaraddi nga manango, itoli na yaw ta danum. Neyavu na mangngana ta baggi na.

"Ngatta pano ta ari nga kiningwa na Yafu nga darakal anna annaraddu i manango ira?"

Ta kabalin na nga nagimmanango, nallirum yaya ta



arung na kayu. Vinukatan na i basiku anna pinattaradday na i makkaparehu nga manango.

Ta pagangwa na taw, egga i minaranni nga kuruga baddi nga tolay anna nagitubang ta biko na.

Nakaddag yayya anna napporay.

“Ngatta ta ari naka kiningwa na Yafu ta atannang?” nakkulle nga neyavu na.

Sinirung na baddi nga tolay yayya anna makafi nga tabbag na.

“Kontento na ngana ta neyawa na Yafu niyakan.”

“Anni!? Nu sakan i Yafu, kuwaku nga darakal anna annaraddu ngamin i ganna-gannug ta mundo.”

Iussaw nga tabbag na lakay nga minammanango.

Ari nabbinnay, ta nisa nga nabalín nagergo, tanakuwan ngana i matageno na ta baggi na. Egga i nattugu nga dudu ta baggi na.

Nabbalin ta paya i lima na. Minapiddu i dua nga takki anna vullaw na. Nabbalin yayya ta dawa.

Sangaw, masingattam yayya nga mattotoyang ta pilapil



anna pipi na bannag. Magaleg ta baraddi nga manango,
tuka anna insekto.

“Nu nappabalo na nakuwan ta ngamin nga ganna-
gannug nga neyawa na Yafu niyakan anna ta karuwan
ira, ari na nakuwan nabbalin ta dawa,” i mabbabawi nga
kinagi na.